



Inatsisartut

*Aningaasaqarnermut Ataatsimiititaliaq
Finansudvalget*

Ulloq/Dato: 30. april 2010
J.nr.: 01.31.06/10-00474

Aningaasaqarnermut Naalakkersuisoq

Aningaasaqarnermut Ataatsimiititaliap suliaq nr. 01.31.06/10-00474 pillugu tallimanngornermi ulloq 30. april 2010-mi aalajangiineranik Naalakkersuisunut ilisimatitsineq.

Mittarfeqarfinni 2010-mi akinut akiliutinullu malittarisassiap iluarsivigineqarnissaa

Naalakkersuisut **inassutigaa**,

- Kontomi pingaarnermi 73.93.02-mi, Mittarfeqarfinnut tunngasumi, aningaasaliissutit 11,873 mio. koruuninik amerlineqassasut.

Aningaasaqarnermut Ataatsimiititaliap oqaaseqaatai

Ilaasut annertuumik ikileriarnersa nassatarisaanik Mitaarfeqarfiit aningaasaqarnikkut ajornartorsiorlut suliami matumani allassimavoq. Taamaalilluni ilaasut ikileriarnerat ilaasut akiliutaannit, mittarfinnut akitsuummit il.il. isertitat ikileriarnernik nassataqarpoq. Suliffeqarfiup isertitatigut tunngavigisaata 2010-mi 27 mio. kr.-inik pitsanngoriartinneqarnissaa pisariaqartinneqartoq suliami allassimavoq.

Tamanna tunngavigalugu kontomut pingaarnermut 73.93.02-mut, Mittarfeqarfinnut tunngasumut, oqaasertaliussami nr. 3-mi piginnaatitsissut aqqutigalugu ilaasut akiliutaasa, mittarfinnut akitsuutip il.il. 1. maj 2010-mi aallartittumik agguaqatigiissillugu 11 procentimik qaffanneqarnissaat Naalakkersuisunit aalajangiunneqarpoq. Tamanna Naalakkersuisut naliliinerat malillugu Mittarfeqarfinnut 15 mio. kr.-it missaannik iluanaarutaassaaq. Mittarfeqarfiit aningaasaliissutissatut pisariaqartitaasa sinneri kontomut pingaarnermut 73.93.02-mut, Mittarfeqarfinnut tunngasumut, aningaasanut inatsimmi isertitassatut missingikkat 0-inngorlugit ikilisinneqarnerisigut pissarsiarineqassapput, tamannarpiarlu Naalakkersuisut suliami matumani Aningaasaqarnermut Ataatsimiititaliamut qinnutigaat.

Qinnuteqaatip akuerineqarnera IST-mi angusassatut missingersuutigineqartumut 2010-mi 11,873 mio. kr.-inik ajorseriaataassaaq.

Suliaq una sisamannornikkut ulloq 29. april 2010-mi, nal. 16 tiguneqarpoq, tassani 1. maj, akinut akiliutinullu malittarisassiap atuutilerfissaa nallertinnagu nukinginnartumik suliarinninnissaq qinnutigineqarluni. Oqaasertaliussamat siuliani taaneqartumut nassuiaatini, aningaasanut inatsit peqatigalugu november 2009-mi akuerineqartumi, akit qaffanneqarsinnaanerat siumut naatsorsuutigineqareersoq eqqarsaatigigaanni Naalakkersuisut matumani pisutut kingusitsigisukkut Aningaasaqarnermut Ataatsimiititaliamut aatsaat qinnuteqarnerat Aningaasaqarnermut Ataatsimiititaliamut assut naammaginangitsutut isigineqarpoq.

Taama sivikitsigisumik piffissaqartitsilluni akinik qaffaanissap nalunaarutigenera pimoorussinnginnerujussuurtut Aningaasaqarnermut Ataatsimiititaliamit isigineqarpoq. – Tamatumani Aningaasaqarnermut Ataatsimiititaliap sulinera aammalu minnerunngitsumik inuttaasut taamaaliornikkut akit qaffannerannut piffissaalluartillugu iliuuseqarnissamut periarfissinneqanngitsut eqqarsaatigalugit.

Akit qaffannissaat tusarniaaffigineqartut arlallit tunuarsimaarfigigaat ataatsimiititaliap maluginiarpa. Tamatumani innerunngitsumik Inuussutissarsiornermut Naalakkersuisoqarfik, tassanga oqaatigineqarluni takornariaqarnermik ingerlatsisunut, nunarsuarmi aningaasaqarnerup ajornartorsionera pissutigalugu eqqornerlugaareersunut tamatuma kingunerluutissai isumakulunnartinneqartut. Tamanna ataatsimiititaliap isumakulunnartippaa. Ajornartorsiut taanna Naalakkersuisunit eqqumaffigineqassasoq ataatsimiititaliamit naatsorsuutigineqarpoq, taamaalilluni inuussutissarsiut siunertaanngitsumik eqqornerlunneqassagaluarpat sapinngisamik siusissukkut iliuuseqartoqarsinnaaqullugu.

Akit qaffannerisa nassatarisaannik eqqornerlunneqaratarsinnaasut pillugit tusarniarneqartut arlallit oqaatigisaat Naalakkersuisunit isummerfigineqarsimasariaqaraluartut ataatsimiititaliaq isumaqarpoq. Tassunga atatillugu suliap matuma ilanngussat ilanngullugit angallannermut isumalioqatigiinnut nassiunneqarnissaa aammalu akit qaffanneqarnerisa kingunereratarsinnaasaannik angallannermut isumalioqatigiissitaq aamma nalileeqquneqassasoq ataatsimiititaliamit **qinnutigineqarpoq**.

Mittafeqarfiit ilaata aktiaateqarluni ingerlatseqatigiiffinngortinneqarnissaa isumaliutigineqarsimasooq Aningaasaqarnermut Ataatsimiititaliamit ilisimaneqarpoq. Tamanna pillugu pilersaarutaajunnartut killiffiannik naatsumik ilisimatinneqarnissani ataatsimiititaliap qinnutigaa.

Aningaasaqarnermut Ataatsimiititaliap nittartagaa aningaasaliissuteqarnissamik suliasat nukinginnartumik suliarineqartussatut nassiunneqartut pillugit piumasaqaatinik imaqartoq naggasiullugu innersuussutigineqassaaq.

Aningaasaqarnermut Ataatsimiititaliap aalajangiinera

Naalakkersuisut inassuteqaataat Aningaasaqarnermut Ataatsimiititaliamit **akuerissutigineqarput**. Apeqqutinut siuliani allassimasunut Naalakkersuisut akissutaat aalajangiinerup matuma tiguneranit ullut 14-it qaangiutsinnagit kalaallisut danskisullu tiguneqarsimanissaa nuutinneratalu uunga nassiunneqarnissaa qinnutigineqarpoq: nch@ina.gl.

Aningaasaqarnermut Ataatsimiititaliaq sinnerlugu

Naaja Nathanielsen

Aningaasaqarnermut Ataatsimiititaliap siulittaasua